



ԱՅՅԵԼՈՒԹՅՈՒՆ ՀԱՐԱՎԱՅԻՆ ԱՄԵՐԻԿԱՅԻ ՏԻՐԱԽՆԱՄ ԹԵՄԵՐԻՆ

Նորին Սրբություն Ամենայն Հայոց Վեհափառ Հայրապետի բարեհաճ կարգադրությամբ Գերագույն հոգևոր խորհրդի ատենապետ Տ. Սիոն արքեպ. Մանուկյանը օգոստոսի 3—10 օրերին, Երուսաղեմի միաբանական խորհրդակցական ժողովին և հոբելյանական հանդիսություններին մասնակցելուց հետո, մեկնում է Հարավային Ամերիկա՝ տանելու համար Ամենայն Հայոց Վեհափառ Հայրապետի ողջույններն ու օրհնությունները Արգենտինայի, Ուրուգվայի և Բրազիլիայի հայ թեմերին և հավատացյալ ժողովրդին:

Օգոստոսի 13-ին, չորեքշաբթի օրը, Սիոն արքեպ. Մանուկյանը ժամանում է Բուենոս Այրես, ուր դիմավորվում է Հարավային Ամերիկայի հայրապետական պատվիրակ Տ. Դավիթ եպս. Սահակյանի, եկեղեցական դասի և թեմական-եկեղեցական վարչության կողմից:

Օգոստոսի 14-ին Կենտրոնական վարչությունը, ի պատիվ սրբազան հոր, տալիս է ճաշկերույթ, որտեղ փոխանակվում են ողջույնի ու բարիգալատյան ճառեր: Ծաշկերույթի ընթացքում խոսք առնելով սրբազան հայրը բոլոր ներկաներին հաղորդում է Ամենայն Հայոց Վեհափառ Հայրապետի ողջույններն ու օրհնությունները:

Օգոստոսի 17-ին, կիրակի օրը, Ս. Աստվածածնի Վերափոխման տոնի առթիվ Բուենոս Այրեսի Ս. Գրիգոր Լուսավորիչ Մայր եկեղեցում ս. պատարագ է մատուցում Հարավային Ամերիկայի հայրապետական պատվիրակ Տ. Դավիթ եպս. Սահակյանը, իսկ քարոզում է Սիոն արքեպ. Մանուկյանը, ժողովրդին հաղորդում Վե-

հափառ Հայրապետի օրհնությունները և ապա խոսում հայ ժողովրդի կյանքում Մայր Աթոռ Ս. Էջմիածնի և Հայ Եկեղեցու կատարած ազգապահպանման դերի մասին և կոչ է անում համերաշխ համագործակցության:

Նույն օրը, երեկոյան, Մայրերի տոնի առթիվ, կազմակերպվել էր հանդիսություն, որին իր մասնակցությունն է բերում նաև Սիոն արքազանը:

Հանդիսության ժամանակ սրբազան հայրը խոսում է հայ մայրերի կոչումի և նրանց կատարած դերի մասին հայոց լեզվի և հայ հավատքի պահպանման գործում:

Հաջորդ շաբաթ Սիոն արքազանը, Դավիթ եպիսկոպոսի ընկերակցությամբ, այցելում է Բուենոս Այրեսի և արվարձանների վեց հայկական ամեճօրյա երկրորդական վարժարաններ, ուր հայեցի դաստիարակություն են ստանում ավելի քան երկու հազար հայ պատանիներ ու աղջիկներ: Ամենուրեք սրբազան հայրը քաջալերանքի և հորդորի խոսքեր է ուղղում ուսանողությանը՝ միաժամանակ խոսելով հայ լեզվի և մշակույթի պահպանման կարևորության մասին սփյուռքի տարածքում:

Սրբազան հայրը տեսակցում է նաև Բուենոս Այրեսի չորս հայկական թերթերի թղթակիցների հետ՝ նրանց տալով տեղեկություններ Մայր Աթոռ Ս. Էջմիածնի, Ամենայն Հայոց Վեհափառ Հայրապետի և Երուսաղեմի միաբանական խորհրդակցական համագործմարի մասին:

Բուենոս Այրես հյուրընկալության օրերին սրբազան հայրը այցելում է տեղի և արվարձանների բոլոր եկեղեցիներ և Ազ-

գային ու Հայրենակցական միությունների կենտրոններ:

Օգոստոսի 24-ին սրբազան հայրը մեկնում է Մոնտեվիդեո:

Կիրակի օրը, օգոստոսի 25-ին, Սիոն սրբազանը Մոնտեվիդեոյի Ս. Ներսես Շնորհալի եկեղեցում, բազմաթիվ հայ հավատացյալների ներկայությամբ, քարոզ է խոսում և կոչ անում ժողովրդին՝ բոլորվելու Հայ եկեղեցու և դպրոցի շուրջ, որոնք են միակ միջոցները մեր ազգային սրբությունները պահպանելու համար:

Սրբազան հայրը այցելություն է տալիս նաև տեղի գույգ վարժարաններին, երկուստեք քաջալերելով ուսանողներին, նրանց խոսում է հայ մշակույթի պատմության մեջ Հայ եկեղեցու կատարած դերի մասին:

Օգոստոսի 26-ին, երեքշաբթի օրը, սրբազան հայրը Մոնտեվիդեոյից մեկնում է Սան Պաբլո: Տեղի օդանավակայանում սրբազանին դիմավորում է Հարավային Ամերիկայի հայրապետական պատվիրակի Բրազիլիայի փոխանորդ Ս. Տաթև ծ. վրդ. Ղարիբյանը՝ քահանա հայրերի և Կենտրոնական վարչության անդամների հետ միասին:

Երկու շաբաթվա ընթացքում սրբազան հայրը այցելում է եկեղեցի, հայ դպրոց, Հ. Բ. Ը. Մ.-ի ընդհանուր կենտրոն, հայկական ակումբ և Մարաշցիների հայրենակցական միության կենտրոն՝ ամենուրեք խոսելով Հայ եկեղեցու և Ս. Էջմիածնի նախախնամական դերի մասին հայ ժողովրդի պատմության ընթացքում: Ապա սրբազան հայրը հորդորում է ժողովրդին, որպեսզի նրանք բոլորվեն եկեղեցու և դպրոցի շուրջ ու սկսեն համերաշխ գործակցություն՝ ի նրա պատ գաղութի հայեցի պահպանման ու զարգացման:

Օգոստոսի 31-ին, կիրակի օրը, Սան Պաբլոյի Ս. Գևորգ Մայր եկեղեցում ս. պատարագ է մատուցում Ս. Տաթև ծ. վրդ. Ղարիբյանը: Խոսնակում քաղմության ներկայությամբ քարոզ է խոսում Սիոն սրբա-

զանը և բոլորին հաղորդում Ամենայն Հայոց Վեհափառ Հայրապետի ողջույններն ու օրհնությունները և կրկին կոչ է անում ժողովրդին՝ գործել համերաշխ Հայ եկեղեցու պայծառության և հայ դպրոցի զարգացման ու պահպանության համար:

Հաջորդ կիրակի, սեպտեմբերի 7-ին, սրբազան հայրը պատարագի ընթացքում քարոզ է խոսում Օգոստոս քաղաքի հայ եկեղեցում՝ անդրադառնալով քրիստոնեական սիրո և հավատքի մասին և հավատացյալ ժողովրդին կոչ է անում սիրել իրենց մայրենի եկեղեցին, Ս. Էջմիածինը, Հայաստան աշխարհը, հայոց լեզուն ու մշակույթը:

Եվ այսպես, իր շուրջ մեկամսյա հովվական այցելություններից հետո Ս. Սիոն արքեպ. Մանուկյանը սեպտեմբերի 12-ին լավագույն տպավորություններով վերադառնում է Մայր Աթոռ:

Հարավային Ամերիկայի հայրապետական պատվիրակության թեմի մեջ են մտնում չորս երկրներ՝ Արգենտինան, Բրազիլիան, Ուրուգվայն ու Չիլին:

Մի փոքրիկ համայնք է գործում նաև Վենեսուելայի մայրաքաղաք Կարակասում:

Մոտավորապես 100.000 հայեր են ապրում Հարավային Ամերիկայի այս երկրներում, որտեղ գործում են 10 հայկական եկեղեցիներ և մույնքան հայկական վարժարաններ:

Միայն Արգենտինայում հայերեն լեզվով հրատարակվում են չորս թերթեր:

Ուրուգվայի համայնքն ունի նաև հայկական ուղիղի ժամեր:

Հարավային Ամերիկայի հայ գաղութը գտնվում է բարեկեցիկ, բարգավաճ և կազմակերպված վիճակում: Եկեղեցական, ազգային, բարեգործական և մշակութային կազմակերպությունները եռանդուն աշխատանք են տանում՝ պահպանելու համար հայ լեզուն և մշակույթը, ազգային ավանդություններն ու հայկական ոգին:

